

feeste ter ere van Koningin Wilhelmina. Duidelik is te onderskei een van die segewaens wat 'n Hollandse vaartuig voorstel van die denkbeeldige Stoomvaartmaatskappy Nederland—Zuid-Afrika; die Rederykerskamer „Onze Taal”; die Boogschuttersvereniging „De Batavieren” en nog drie segewaens wat die optog afgesluit het. Jammer genoeg verskyn nêrens die peleton artillerie; die Transvaalse en die Nederlandse vlag voorgestel deur dames; die erewag te perd; die Hollandsch Mannenkoor en die 500 kinders, wat almal voorop in die optog opgestel is

Uit 'n goedbewaarde foto-album met sowat 50 foto's uit die jare kort voor 1900, verskyn 'n besonder mooi foto (15 x 20 cm) van rondom 1896, wat 'n volledige aansig bied van die Westelike sy van die Kerk op Kerkplein. Op die agtergrond is 'n aantal geboue aan die Oostekant van die plein te sien, terwyl 'n hele bedrywigheid op die voorgrond is: 'n paar ossewaens, kebs, 'n man te perd, twee ander met fietse, ander wat net rondstaan, 'n polisieman in Z.A.R.P.-uniform, 'n paar kindertjies in tipiese drag van die tyd, ens.

'n Ander foto van Kerkplein uit dieselfde jare gesien uit een van die geboue, toon die kerkgebou in sy glorie tydens nagmaal. Die Grand-hotel, die Raadsaal en feitlik die hele Westekant van die plein word afgebeeld.

Die presidentswoning in Kerkstraat-Wes is op 'n foto (15 x 20 cm). Die vierkleur wapper en 'n jong seun, vir wie die foto seker opgestel is, verskyn deftig tussen die twee wagt.

Uit die jare rondom 1896-1899 verskyn die volgende foto's, in alle waarskynlikheid geneem deur 'n fotograafvriend: gesig deur Daspoort met treinspoor en pad; gesig deur Wonderboompoort, t.w. een foto met uitsig na die Noorde en 'n ander in die teenoorgestelde rigting met 'n paar woonhuise op die voorposte voor die poort; twee foto's van Wonderboom in sy toenderdtydse glorie; die fontein in Burgerspark; die Oosterspoor by die Fonteinedal met F. C. Kraamwinkel en sy eggenote. Vir natuurliedhebbers is 'n drietal foto's 'n lus: van Witpoortjie en die waterval by Krugersdorp, soos dit in 1899 daaruit gesien het toe 'n groepie oud-Hollanders uit Pretoria daar gaan piekniek maak het.

## HISTORIESE FOTO'S

Onder die historiese foto's verskyn 'n uitmuntende foto (12 x 15 cm) — waarskynlik afkomstig van die amateur fotograafvriend — van die vlag-hysing deur die Britse militêre magte by die Raadsaal in Pretoria op 5 Junie 1900. Volgens wat skrywer altyd van sy vader verneem het, is die foto geneem terwyl 'n miniatuur Union Jack gehys word, wat deur 'n dogter van Lord Roberts aan haar vader saam gegee is om eerste gehys te word. Die vlaggie is sigbaar.

'n Foto (15 x 20 cm) is getiteld „The War Scare. A scramble for room in open cattle trucks”, met toeskouers wat die saak meer rustig betrag. Die foto dateer uit 1899, waarskynlik op die Pretoriase stasie.

Ander foto's (15 x 20 cm) is o.m. van genl. Louis Botha en sy wit perd en volledige velduitrusting; komdt. Trichardt en sy twaalfjarige seun met 'n groepie gewapende burgers in 1899; 'n groepie Tommie-gevangenes; 'n Engelse lyddiet-bom wat nie by Spioenkop gebars het nie met die woorde daarop gegraveer:

GESCHENK  
aan  
ZHEd. den Staats-President  
S. J. P. KRUGER  
ter herinnering aan de Slag  
van  
SPIOEN-KOP  
Natal 24 jan 1900  
van  
P. C. Robertson Kapt. Adj. D.C.  
Ps. 74 = 14

'n Foto (15 x 20 cm) toon 'n Long Tom wat deur 'n drif getrek word op pad na Ladysmith, 1899, terwyl 'n paar ander alhoewel bekende foto's betrekking het op die Slag van Spioenkop.

Oud-Kaapstad, enkele jare voor 1900, word op agtien foto's (15 x 20) afgebeeld.

#### FAMILIE-FOTO'S

Sowat 140 familie-foto's van die ouer geslag en die voorsate, en van hul woon- en werkkring in die ou stamland, almal wat volledig toegelig is, is vir die genealoog 'n waardevolle nalatenskap.

P. O. KRAAMWINKEL.


---

---

## DIE JONGSTE PRETORIUS-GEDENKDIENS

'n Groot aantal belangstellendes het op Sondagvoormiddag 9 Februarie jl. by die gedenknaald voor die Verdedigingshoofkwartier, Potgieterstraat, Pretoria, saamgekóm om in die vorm van 'n in alle opsigte geslaagde gedenkdiens ter nagedagtenis van Lt-kol Henning Petrus Nicolaas Pretorius, in tewe kommandant van die Transvaalse Staatsartillerie by te woon en op dié wyse hulde te bring aan 'n uitstaande militêre leier van vergange dae.

Hierdie Transvaalse militêre figuur was die seun van Marthinus Wessel Pretorius, 'n neef van die gelyknamige Transvaalse Staatspresident en Debora Jacoba Retief, die dogter van die bekende Voortrekkerleier Piet Retief.



*Ou Foto van die gedenkteken ter ere van Lt.-Kol. Henning Pretorius.  
(Die tralies daaromheen, asook die pilaartjies met kettings is tans nie meer  
daar nie.)*

Hierdie Voortrekkerseun is op 9 Februarie 1844 op Pietermaritzburg gebore en het tydens die krygsverrigtings teen Sekokoeni (1876) sy militêre loopbaan as veldkornet begin.

Tydens die Eerste Vryheidsoorlog het hy hom by die slag van Elandsfontein, naby Pretoria, onderskei (16 Januarie 1881), twee verwondings opgedoen en op dié wyse naam gemaak.

In 1882 het sy aanstelling as kommandant van die toenmalige Trans-

vaalse Artilleriekorps gevolg en in hierdie hoedanigheid het hy aan die veldtog teen Mapog deelgeneem. Dan volg sy optrede aan die suidwestelike grens van die Republiek, sy ampsperiodes as Waarn. Kommandant-generaal en Superintendent van Naturelle, as Kommissaris van Polisie (1895) en as een van die amptelike verteenwoordigers van die Z.A.R. ten tye van die aanstelling van Boenoe as kaptein van Swaziland.

Na sy optrede tydens die ekspedisie teen Malabog het sy bevordering as Luitenant-kolonel van die gereorganiseerde Transvaalse Staatsartilleriekorps (1896) gevolg. Aan hierdie grondlêer van hierdie modelorganisasie wat tydens die Tweede Vryheidsoorlog louere sou verwerf, en aan 'n vader vir almal wat dit as 'n eer beskou het om onder hom te dien, is ook weer hulde gebring.

Aan sy gesin, aan sy Korps, aan sy Land en aan sy Volk het hierdie gebore militêre leier aan die begin van 1897 ontval.

Net soos verlede jaar is vanjaar se gedenkdiens weer onder beskerming van die Afrikaanse Kultuurvereniging Volk en Verdediging (AKVV) gehou.

Na aankoms van die Senior Weermagsverteenvoorder, Lt genl W. P. Louw, SM, is die erediens deur die Direkteur van Kapelane, Brig. J. A. van Zyl, gelei.

Daarna het die Laaste Taptoe, gevolg deur die Oggendsinjaar weerklink. 'n Koor van die Diensvakschool het „Slaap rustig dapper helde” ten gehore gebring. Vervolgens is 'n aantal kranse aan die voet van die gedenkteken gelê wat in die laat negentiger jare as 'n huldeblyk ter nagedagtenis van Lt-kol H. P. N. Pretorius opgerig is. Die volgende kranse is gelê:

Namens die Suid-Afrikaanse Weermag deur Lt genl W. P. Louw, SM; namens die Transvaalse Staatsartillerie SAA deur Kmdt J. J. G. B. Knoetze; namens die Pretoriusgeslag deur mev. A. C. Kearney (die oudste oorlewende dogter van Lt kol H. P. N. Pretorius); namens die ATKV (SAS en H) deur Brig M. van Vuuren, SMO; namens die ATKV (P en T) deur mnr. J. Z. Venter; namens die AKPOL deur Maj C. J. W. du Plooy; namens die AKVV deur Kol W. A. Lombard; namens die Oudstryders deur mnr. Evert Dommissie; namens die SA Kanonniersbond deur mnr. L. H. Walton; namens die plaaslike tak van dieselfde Bond deur mnr C. J. L. Stegman. Namens die Genootskap Oud-Pretoria is 'n krans deur dr N. A. Coetzee gelê.

'n Erewag, troepe, die SA Leërorke en 'n steeds groeiende skare belangstellendes het vanjaar se verrigtings op 9 Februarie bygewoon. Jaarliks sal hierdie gedenkdiens ons herinner aan ons militêre verlede, ons militêre tradisie en bo alles aan die liggende voorbeeld van 'n Henning Petrus Nicolaas Pretorius, een van die militêre leiers van naam uit die verlede.

Kmdt. J. PLOEGER,

*Militêr-Historiese en Argivale Dienste.*

# DIE HERKOMS VAN DIE NAME VAN DIE STRATE IN DIE OMGEWING VAN DIE PRETORIASE ONDERWYSKOLLEGE

*Die strate waaroor hierdie studie gaan lê  
hoofsaaklik in die Pretoriase voorstad,  
Sunnyside, 'n paar besonderhede waaroor  
dus nie onvanpas hier sal wees nie.*

**T**OE die wyk Sunnyside op 22 Julie 1875 deur James E. Mears aangelê is, het dit al by die Engelssprekende inwoners bekend gestaan as die „Sunny Side”, welke bewoording reeds op kaarte van ou Pretoria voor 1875 verskyn het vir die gebied beooste die Apies teen die Elandspoortrand.

Op 8 Februarie 1888 is Sunnyside by Pretoria ingelyf en teen 1898 was 235 erwe reeds beset.

In Oktober 1899 by die uitbreek van die Tweede Vryheidsoorlog het die voorstad Sunnyside (die tweede van Pretoria — Arcadia was die eerste) nog daar wild en romanties uitgesien, aangesien dit toe nog heeltemal in 'n natuurstaat verkeer het.

Die opmeetwerk in Sunnyside (en Muckleneuk) is hoofsaaklik gedoen deur G. R. von Wielligh en Johann Rissik.

Oorspronklik het Mears, wie se huis gestaan het waar die Normaal-kollege is, erwe 35–37 en 48–51, besit.

Die Onderwyskollege se dameskoshuis, het volgens die munisipale waardasielyste, erwe 35–38 en 48–51 beslaan, terwyl die geldstaat van Openbare Werke van 8 November 1902 melding maak van £18,010 vir erwe nos. 30–34 en 45–47 en twee huise daarop wat bedoel was as terrein vir die „Normal School.”

Teen die einde van 1902 het verbruikers in Pretoria kraanwater begin kry en kort daarna het die inwoners van Sunnyside (en Arcadia) ook in die voorreg gedeel. In 1914 was Sunnyside (net soos Arcadia en Pretoria self) al goed verlig deur elektrisiteit. Vervolgens dan die strate in die betrokke gebied wat na bepaalde persone vernoem is:

*ESSELENSTRAAT* heet na Ewald Auguste Esselen wat op 27 September 1858 op Worcester, K.P., gebore is en uit 'n Rynse sendingfamilie stam. Sy vader was eerw. L. F. Esselen.

Na sy skoolopleiding is Ewald na die Universiteit van Edinburgh, Skotland, om hom in die medisyne te bekwaam. In 1881 keer hy egter na Suid-Afrika terug. In Transvaal is die Eerste Vryheidsoorlog toe nog aan die gang en hy gaan daarheen om hom te Heidelberg te voeg by

wise-president Kruger vir wie hy optree as private sekretaris by die vredesberaad en latere onderhandelings op Newcastle, Natal.

Na die vrede keer hy op advies van Kruger na die buiteland terug vir verdere studie — hierdie keer in die regte aan die Inner Temple, Londen, waar hy hom as advokaat bekwaam. In 1883-84 dien hy as sekretaris van die afvaardiging onder Kruger wat na Engeland gegaan het om 'n wysiging van die Pretoriase Konvensie te verkry. Na sy terugkeer in sy vaderland, word hy in 1885 te Kaapstad tot die balie toegelaat. In 1886 word hy gekies tot lid van die Wetgewende Vergadering vir Richmond, K.P., as ondersteuner van die *Afrikanerbond*.

In 1887 aanvaar hy in die Z.A.R. die betrekking van strafregter wat hom die vorige jaar deur pres. Kruger aangebied is. Hy bly in die betrekking aan tot 1890 toe hy om persoonlike redes bedank en hom as advokaat in Pretoria vestig. Daarna het hy Potchefstroom eers in die Tweede Volksraad en in 1893 in die Eerste Volksraad verteenwoordig.

In 1894 word hy benoem tot prokureur-generaal van die Z.A.R., maar die jaar daarop het hy bedank en weer as advokaat gepraktiseer. As sodanig bestempel een van sy tydgenote hom as iemand „who had the greatest gifts of advocacy with which I have come into contact,”<sup>4</sup> terwyl 'n ander weer verwys na „. . . die glimlaggende en skerpsinnige Advokaat Ewald Esselen wat op 'n baie taktvolle manier die getuie van sy teenstander se vertroue kon win en dan al met eens op hom neersak om hom op 'n teenstrydigheid in sy eie getuienis te wys.”<sup>5</sup>

Hy word in 1900 krygsgevangene geneem, maar tog toegelaat om op parool na Europa te gaan. Hy keer in 1902 terug en begin weer as advokaat praktiseer. Sy belangstelling in die politiek het hy na die oorlog behou; hy was 'n groot yweraar vir selfregering en een van die stigters van „Het Volk”-party in Transvaal in 1904.

Aan die begin van 1918 is hy in Seepunt oorlede en daarna in die Ou Begraafplaas te Pretoria begrawe.

- (Bronne: 1. *Pretoria 1855-1955*, uitgegee deur die Stadsraad van Pretoria, 1955.  
2. *Terugblik oor die Eerste 50 Jaar*. Die Pretoriase Normaalkollege — prof. C. K. Oberholzer.  
3. Cloete, J. J. N.: *Die Ontstaan en Ontwikkeling van die Munisipale Bestuur en Administrasie van Pretoria tot 1910*: Argiefjaarboek, Deel I, 1961.  
4. *S.A. Who's Who* 1908, bl. 123.  
5. *Pretoriana*, Nos. 16 & 17, Julie-Sept. 1955, bl. 84.  
6. *Die Kinderensiklopedie*, Deel. XI, 1962, bl. 5079.)

**JORISSENSTRAAT** is vernoem na dr. Eduard Johan Pieter Jorissen.

Van die twee Hollanders wat in besonder in verband met die Eerste Vryheidsoorlog altyd 'n ereplek sal bly behou — dr. E. J. P. Jorissen en W. Eduard Bok wat in 1877 saam met pres. Kruger op 'n deputasie na Engeland vertrek het om die Boeresak aldaar te verdedig — was eersgenoemde miskien die skouspelagtigste persoonlikheid.



Kaart van gedeelte van Sunnyside met strate en erfnummers.

Hy is op 10 Junie 1829 in die stad Zwolle, Nederland, gebore, en het, net soos sy vader, predikant geword en in 1853 selfs in die Teologie gepromoveer aan die Universiteit van Utrecht.

Tydens pres. Burgers se besoek in 1875 aan Nederland, het hy Jorissen oorgehaal om as dosent in Klassieke Tale aan die beoogde Staatsgimnasium na Pretoria te kom.

Hy het in November 1875 na Suid-Afrika gekom, maar by sy aankoms te Kaapstad is aan hom voorgestel dat hy hom bekwaam vir toelating as 'n regspraktisyn met die oog daarop om Staatsprokureur in die Z.A.R. te word. Voordat hy na Pretoria via Durban vertrek, het Jorissen eers die drie boeke gekoop wat by Volksraadsbesluit van 19 September 1859 as outentiek erken is. Op 6 Februarie 1876 arriveer hy dan per ossewa in Pretoria en op 9 Junie 1876 word hy Staatsprokureur nadat hy aan die „Rechtsgeleerde Commissie” se eksamenvereistes voldoen het.

In 1877-78 vergesel hy Paul Kruger op twee Transvaalse sendings na Londen. By sy terugkeer gaan hy met sy werk as staatsprokureur voort, en toe sy aanstelling op 1 Oktober 1878 deur Shepstone beëindig is, het hy as prokureur gepraktiseer.

Nadat Jorissen in 1881 die Boereleiers gedurende die Eerste Vryheidsoorlog as diplomatieke raadsman gedien het, speel hy 'n belangrike rol tydens die vredesonderhandelinge wat tot die Konvensie van Pretoria gelei het. Hierna word hy weer staatsprokureur.

Maar Jorissen wat uitgesproke was en moeiliker geword het om oor die weg mee te kom hoe ouer hy geword het, is in 1883 vir die tweede maal as staatsprokureur van sy amp onthef onderwyl hy in Europa was. Met medewerking van hoofregter Kotzé en deur middel van valse beskuldigings, het ds. S. J. du Toit die goedkeuring van die Staatspresident vir dié ontslag weet te verkry.

Van Februarie 1884 tot 1886 was Jorissen lid van die Volksraad vir Pretoria en praktiseer hy as 'n advokaat en prokureur.

In 1886 gaan hy na Holland om die aanname van die Transvaalse spoorwegkonsessie deur die Nederlandse maatskappy te bevorder. Na sy terugkeer van Europa af in Augustus 1887, praktiseer hy in Pretoria tot 1888 toe die Regering hom vra om regter te word in Johannesburg. Die volgende jaar sterf sy seun S. G. Jorissen en op 1 September 1890 volg vader E.J.P. sy seun op as regter van die Hooggeregshof van die Z.A.R., en beklee die amp tot in 1900 toe hy uit diens getree het.

Dr. Jorissen was met 'n dogter van pres. Burgers getroud. Na afloop van die Tweede Vryheidsoorlog het hy hom in Nederland gevestig, en hom aan die openbare lewe onttrek tot sy dood op 20 Maart 1912 in Den Haag.

In 1897 publiseer hy sy werk *Transvaalse Herinneringen 1876–1896*.

(Bronne: 1. *Pretoria 1855–1955*. Uitgegee in 1955 deur die Stadsraad van Pretoria.  
2. *Kinderensiklopedie*, Deel XI, 1962).



**JOUBERTSTRAAT** dra die naam van die eertydse kommandant-generaal van die Z.A.R., te wete Petrus Jacobus Joubert wat op 20 Januarie 1831 op die plaas Damaskus, digby Prins Albert in die Kaapkolonie gebore is.

In 1836 trek hy saam met sy ouers onder leiding van Piet Retief uit die Kaapkolonie weg, neem deel aan die slag teen Sechele (1852) en in die Vrystaat aan 'n veldtog teen die Basoeto's (1865).

In 1886 word hy as volksraadslid vir Wakkerstroom gekies, en tree in 1875 en 1876 op as waarnemende president van die Z.A.R. tydens die afwesigheid van pres. Burgers.

In 1877 volg die anneksasie van Transvaal deur Shepstone en Joubert vertrek in 1878 as lid van die tweede deputasie na Engeland in 'n poging om die Britse regering te oorreed om die vryheid van Transvaal terug te gee.

In 1880 (op 13 Desember by Paardekraal) word hy gekies as lid van die Driemanskap (saam met vise-pres. Paul Kruger en Martinus Wessel Pretorius) en benoem tot kommandant-generaal van die Boeremagte, 'n amp wat hy tot sy dood bly beklee het.

In 1883 word hy vise-president van die Z.A.R.

By die uitbreek van die Tweede Vryheidsoorlog in Oktober 1899, is hy opperbevelhebber van die Boeremagte wat die suidoosgrens moes verdedig.

Joubert is op 27 Maart 1900 in Pretoria oorlede en op sy plaas Rustfontein in die Wakkerstroomdistrik begrawe.

(Bronne: 1. *Pretoria 1855–1955*.  
2. *Die Kinderensiklopedie*, Deel XI, 1962.)

**KOTZÉSTRAAT** is vernoem na regter (later sir) John Gilbert Kotzé wat op 5 November 1849 te Leeuwenhof, Kaapstad, gebore is. Sy vader was P. J. Kotzé 'n eertydse burgemeester aldaar. John ontvang sy skoolopleiding in *Tot Nut van 't Algemeen*, en gaan in 1864 vir verdere opleiding na die Suid-Afrikaanse Kollege. In 1869 vertrek hy na Londen om in die regte te studeer. Hy keer in 1874 terug en praktiseer as advokaat in Kaapstad.

In Maart 1877 (op slegs 27-jarige leeftyd) val hom die onderskeiding te beurt dat pres. Burgers hom in Kaapstad die betrekking van Hoofregter van die Z.A.R. aangebied het. Voordat hy egter die Transvaal kon bereik, het Shepstone die beheer daar oorgeneem en met sy aankoms in Pretoria, tref hy nie Burgers nie, maar Shepstone aan bewind van sake.

Kotzé het die anneksasie as 'n voldonge feit aanvaar en op Shepstone se versoek die betrekking in 'n waarnemende hoedanigheid vanaf 23 Mei 1877 vir die duur van die Britse administrasie beklee.

Na afloop van die Eerste Vryheidsoorlog het hy die amp in 'n permanente hoedanigheid aanvaar. In die verkiesing van 1893 is hy naas Kruger en Joubert, ook kandidaat vir die presidentskap. Hy vaar egter maar swak en verloor daarna alle belangstelling in die politiek.

In 1897 kom regter Kotzé in botsing met pres. Kruger oor die reg van die regbank om wetgewing van die Volksraad te toets — die sg. toetsingsreg. Wet no. 1 van 1897 wat deur die Transvaalse Volksraad na aanleiding van die geskil aangeneem is, het bepaal dat 'n regter wat hom die mag „aanmatig” om 'n wet of besluit van die Volksraad aan die grondwet te „toets”, nie as regter kan aanbly nie. 'n Lang en onplesierige hofgeding het in 1898 met die ontslag van Kotzé ten einde geloop.

Daarna word hy agtereenvolgens prokureur-generaal van Suid-Rhodesië (1900), regter-president van die Oos-Kaaplandse Afdeling van die Hoogeregshof (1904), regter-president van die Kaapse Afdeling van die Hoogeregshof (1913), tot ridder geslaan (1917), en as appèlregter van die Unie aangestel (1922). In 1927 tree hy in laasgenoemde hoedanigheid af. Op 1 April 1940 is hy te Kaapstad oorlede.

(Bronne: 1. *Kinderensiklopedie*, Deel XI, 1962.

2. *Pretoria 1855–1955*.

3. *S.A. Biografiese Woordeboek*, Deel I. (Sy doopname was Johannes Gysbert Blanchenberg, maar hy maak sy lewe lank gebruik van die verengelste name.)

**MEARSSTRAAT.** Van James Edward Mears is daar blykbaar baie min biografiese besonderhede geboekstaaf, behalwe dié wat opgeteken is in die hierna genoemde artikel van Adolf Koen.<sup>1</sup> Hierin word egter vermeld: „Vandag onthou niemand hom meer nie. Net sy familie. Sy naam is slegs 'n straat in Sunnyside, Pretoria . . .” En verderop: „Mearsstraat in Pretoria is na hom vernoem — die man wat 'n bloedstryd moes stry, die pionier wat eers oorwinning kon smaak nadat hy alles verloor het . . .”

In 1840 stap hy van Londen af in Durban aan wal. In Pietermaritzburg ontmoet hy sy toekomstige vrou, ene Johanna Agnita Raats, 'n kleinniggie van die Voortrekkerleier Gerrit Maritz. Uit hul huwelik is gebore Charlie, Jack, Eddie, Lucy en Walter (later komdt. Walter Mears<sup>2</sup>).

Sowat dertig jaar na Mears se aankoms in Suid-Afrika, kom sy ossewatrek in Pretoria aan, waar hy „Elandshoek” gekoop het, wat nou Sunnyside is. Na drie jaar het dit soos 'n modelplaas gelyk. Hierna koop hy talle ander plase, sommige vir slegs £15. In een hoek van die Springbokvlakte had hy 50 plase, terwyl die plaas Kafferskraal, Rustenburg, wat aan Paul Kruger se plaas gegrens het, ook deur Mears gekoop is. (Blykbaar had hy nie die kaart en transport vir al die menigte plase uitgeneem nie.)

Na die Eerste Vryheidsoorlog verlaat hy sy plaas Elandshoek tydelik en begin 'n perdeboerdery op sy plaas Leeufontein, Boshofdistrik.

Later is hy 'n tydlang woonagtig in die sierlike miljoenêrswoning „Rocklands”, Seepunt, Kaapstad. Hiervandaan is hy tydens die Tweede Vryheidsoorlog na Engeland om daar maatskappye te stig, terwyl sy vrou en kinders vermoedelik in die Oorlog hul aan die kant van hul volksgenote in Transvaal kom inwerp het.

Aan die begin van 1903 kom hy weer in Pretoria terug — vervreemd

van sy gesin, terwyl al sy grond verkoop of teruggeneem is om sy skulde te dek. Oor die grondkweessies word talle hofsake gevoer — waarvan die laaste in 1914 toe die Eerste Wêreldoorlog al uitgebreek het, hom sonder geld of heenkome gelaat het.

Intussen is sy vrou oorlede en in Johannesburg begrawe. Met sy kinders het hy versoen geraak, maar is te trots om hulle om hulp te vra.

En Mears wat in Pretoria 'n „lewe van weelde en oorfloed geken het, sou hom ook by 'n lewe van armoede en gebrek moes aanpas. Dit moes sy laaste oorwinning wees. 'n Paar maande later, lank voor die einde van die oorlog, is hy een oggend dood in sy kamer gevind. En vandag is daar nog net die straat, Mearsstraat in Pretoria, om aan die vreemde lotgevalle van hierdie man te herinner.”

In die Brixtonbegraafplaas, Johannesburg, dui net 'n houpie grond aan waar die oorskot van James Edward Mears sedert Sondag, 30 Mei 1915 rus.<sup>3</sup>

Onder Sunnyside hierbo word daar ook melding gemaak van Mears se eiendom wat later deur die staat bekom is vir die teenswoordige Onderwyskollege.

- (Bronne: 1. Koen, Adolf: „Die Verlore Vader”: *Die Brandwag*, Vrydag, 18 Junie 1958.  
2. *Die Nasionale Boek*, Pretoria, Okt. 1931, bl. 548 i.v.m. Komdt. Walter Mears.  
3. Mededeling: Henry Louis Johnson, Bestuurder, Braamfonteinbegraafplaas.)

**RISSIKSTRAAT** is vernoem na Johann Friedrich Bernhard Rissik.

In Pretoria en ook in Transvaal is die naam Rissik alom bekend en is verbind aan strate (bv. ook Johannstraat, Johann Rissik-rylaan) 'n skoolkoshuis, (Rissik House, Pretoria Boys' High) 'n poskantoor en 'n stasie (albei genaamd Rissik) en selfs aan 'n parlementêre en provinsiale kiesafdeling in Pretoria.

Johann, die tweede seun van dr. Gerrit Hendrik Rissik wat op aandrang van pres. Burgers in 1875 uit Holland na die Z.A.R. verhuis het, is op 2 Februarie 1957 in Linschoten naby Utrecht, Holland, gebore. Hy het 'n uitstekende onderrig ontvang in tale (kon vroeg al Nederlands, Engels, Duits en Frans vloeiend praat), letterkunde, geskiedenis, wiskunde en wetenskap.

Hy was aanvanklik assistent in sy vader se apteek in Pretoria. Op 25 Februarie 1882 word hy in die Landmeter-generaal se Departement as tweede staatsklerk aangestel, en op 1 Junie 1895 word hy deur pres. Kruger as Landmeter-generaal van Transvaal aangestel en op 4 November word hy ook Swaziland se Landmeter-generaal.

In 1888 stig Rissik saam met E. P. A. Meintjes en J. D. Celliers, die Trevenna Estate Syndicate, en koop 19 morg 30 vk. roede genaamd „Trevenna” van die plaas Elandsport 193 en sny dit op in erwe en strate.



*Foto: G. J. van Eck*

*In die Ou Begraafplaats, Pretoria*

In 1893 verkoop die Sindikaat die Trevenna-strate aan Rissik. Gemelde drie persone is ook geassosieer met die uitleg van Sunnyside en Arcadia waar hulle ook strate besit het, waarvan sommige na hulle vernoem is.

Na Johann se huwelik op 8 Oktober 1890 te Kaapstad met Maria Magdalena Wilhelmina („Mimmie”) Leibbrandt, gaan hulle op ’n uitgereide reis na Europa, en vestig hulle na hul terugkeer die volgende jaar

te Pretoria in hul woning „Linschoten”, waar hulle drie-en-dertig jaar lank gewoon en hul vier seuns opgegroeï het.

Aan die Tweede Vryheidsoorlog en die landsake daarna neem Rissik sy regmatige aandeel.

Die erfpagplaas „Uitvalgrond no. 67, Distrik Pretoria, Wyk Apiesrivier” behooste Pretoria het reeds voor die oorlog aan Rissik behoort. Tussen 14 April en 26 Oktober 1910, het hy daarop die dorpsgebied Hillcrest gestig waar onderwys- en godsdienstige instansies by sy vrygewigheid gebaat het.

Benewens Rissik se veelsydige openbare aktiwiteite — lid van kommissies, maatskappydirekteur, plaasboer, ens. het hy ook op politieke gebied ’n leidende rol gespeel by die stigting, saam met genls. Botha en Smuts, van „Het Volk”-party wat die eerste algemene verkiesing onder Verantwoordelike Bestuur in Transvaal op 20 Februarie 1907 betwis en gewen het. Op 4 Maart 1907 word Johann Rissik Minister van Lande en Naturellesake in Transvaal en lid van die Uitvoerende Raad van Transvaal.

As Minister van Lande het hy vir die Transvaalse Regering die grond gekoop wat uitgesoek is as terrein vir die toekomstige Uniegebou wat toe daarop gebou is.

By die totstandkoming van die Unie van Suid-Afrika op 31 Mei 1910, word Rissik die eerste Administrateur van Transvaal, en in Mei 1915 is hy in daardie hoedanigheid herkies. Op 13 Junie 1917 dien hy by die Eerste Minister (genl. Botha) sy bedanking as Administrateur in, wat met groot spyt aanvaar is en op 24 Julie in werking getree het.

In 1912 het Rissik die nuwe Pretoriase Spoorwegstasie geopen wat deur Herbert Baker ontwerp is. In 1917 word hy ’n Spoorweg- en Hawenskommissaris, en ’n Staatskuldkommissaris op 31 Desember 1919, welke twee poste hy tot sy dood toe beklee het. Op 11 Junie het hy die Hercules-Magaliesspoorlyn deur die Moot formeel geopen.

In 1923 verkoop Johann Rissik die „Linschoten”-landgoed wat toe as ’n dorp met daardie naam uitgelê is. In 1924 betrek hy die nuwe „Linschoten Huis”, geleë net onderkant die terrein van die ou opgaardam op die hoek van Parkstraat en Ministraat — per abuis aldus op die oorspronklike diagram genoem pleks van „Mimmie”, sy vrou.

Net ’n paar maande het hy die nuwe huis bewoon toe hy op 26 Augustus 1925 oorlede is. Die rede by sy ter aardebestelling in die Ou Begraafplaas, Kerkstraat-Wes, is waargeneem deur ds. H. S. Bosman, predikant te Pretoria van 1876-1926. Genl. J. C. Smuts, een van die slippe-draers het gepraat oor Johann Rissik se groot dienste aan Suid-Afrika. Die eenvoudige granietgrafsteen is ontwerp deur dr. Gordon Leith wat in 1913 een van die jong argitekte was wat sir Herbert Baker met die Uniegebou bygestaan het.

(Bron: *Pretoriana*, No. 49, Des. 1965: Johann Rissikuitgawe).

(Word vervolg.)

(Mej.) K. M. VAN ECK